

皇

清

奏

議

皇清奏議卷四十七

請定經制以節民用疏 乾隆十六年 孫宗溥

掌貴州道監察御史臣孫宗溥謹 奏為請酌定經制以節民用事伏惟我 皇上宵旰圖維民依念切本年

巡幸江浙因地方習尚紛華蓋藏未裕疊蒙 諭旨

飭勵臣民凡欲使易俗移風共臻仁壽之治此教養斯民之至意也竊思風俗之奢靡其致之也必以其漸則更化之道固非刑驅勢迫之所可強制亦非家喻戶說之所能遽曉即在守土之臣如郡縣吏與民最親有化導之責然使任以經畫民間日用之事而漫無繩尺可守則將因循而任其自然又或苛細而近於紛擾其於轉移風俗之道究難濟於實用是必酌定章程為之限制使有司得所依據小民知所適從然後返樸還淳可以歸之畫一夫食時

用禮聖人治世之大經也。記曰：國奢則示之以儉，國儉則示之以禮。蓋由儉而流於奢，民所自為也。由奢而返於儉，則民不能自主，在立度數以節之。臣嘗熟察今日之民情，不患其好侈而不節，正患其欲儉而不能。何者？漸染已深，勢難驟改。即如江浙人稠居密，生齒無窮，物產有限，衣食之計亦甚艱矣。其中殷實之家，豪華自喜，藉以誇耀鄉鄰者固不乏人。至於勉強徇俗，剝肉成瘡而黷然不樂者甚多。蓋其心實不願奢，亦且其力萬不能奢。而隨俗波靡，不得獨儉。如婚禮不奢人以為薄，於姻戚喪事不奢人以為薄，於父母宴會不奢人以為薄，於賓客一家為之則鄰里竊議矣。一人為之則入室交詬矣。然則俗何由變？用何由節？而財更何以豐乎？是非奉朝廷之法，制以均節之則，其拘擥困苦於徇俗之情，終不得解。康熙年間撫臣朱軾

任浙時凡民間婚喪二禮及祭享宴會皆為畧定規模其一切無益之費概行禁止士民翕然從之頗為稱便此其明驗也臣請勅下各該督撫轉飭州縣官各條舉其土俗糜費之甚灼然在所宜禁防者某事彙之督撫督撫為之裁議妥協均立規條恭呈 睿鑒而後下之有司首禁其非禮之費如聚眾迎神科錢演戲之類次禁其托於禮而實為無益之費如婚喪競侈貴賤無等之類於教化之中立制防之限所謂因其勢而利導之也又凡所立限制只須治去太甚疎節濶目使之截然可行原無事委瑣細碎煩苛滋擾如此則人情胥協教令易從富者有節貧者無愧風俗可以漸淳蓋藏可以日裕似於教養斯民之道不無稍有裨益爾

籌戎政事宜疏 乾隆十六年

莽阿納

雲南開化鎮總兵臣莽阿納謹 奏為敬籌戎政事宜仰
祈 聖訓事竊臣愚陋庸材仰荷 皇恩三畀總兵

重任雖殫竭駑駘難報萬一凡此營伍事務皆分所應辦
又何敢瑣瀆 宸聽第措施不當辜負 聖恩是以

心與身不敢一日偷安致滋虛糜之愆謹陳數事仰懇

訓示折中

一官兵步弓宜遵例全改五力以上也查營中軍器首先
弓箭務須箭長弓硬方能致遠出箭平直易於中的臣每
於臨場考驗查看兵弓新舊不一輕重參差多緣無力修
製因循將就行令中軍逐一稽查據稱三營內除五力以
上堪用之弓不計外內有堪用應修弓一百八十三張即
飭辦料修整加筋添力務足五力其有不堪使用弓三張
亦即另為新製五力散給射用共費銀五十七兩一錢零

臣性甘澹泊隨事節省捐益窮伍稍緩兵力又捐製五力
以上弓三十張把箭四十面每日於未申二時在署旁箭
道內臣親率步射令願學射者不拘馬步鎗手餘丁通准
隨班輪流演習現成弓箭不費己資人人爭射指授射法
領會者多從前後肘過高撒放無力之處今則弓硬箭長
肘平拉滿撒放結實已改十分之六矣

一馬弓與射法宜照步射一式也查雍正十三年署天津
鎮臣補熙奏准定例官兵馬箭不得另用軟弓務須馬步
一弓拉射指法當與步射一樣奈例行已久合式者固有
不遵者甚多俱另用軟弓或將兩指捻扣翻勾弦於次指
中指之間或滿把拉弓夾箭於次指中指之中惟圖出箭
離弦全無準頭且有將弓梢插入檔內施展不能自如均
屬有違定式臣每於考驗之時務必親為騎射以示適從

惟恐積習相沿驟難更易復又寬以三月之限務令通行
全改咸歸合式

一馬兵騎射宜鎗箭二技也查武場舉子考試一馬當須
三箭以覘嫻熟而馬兵專在武藝獨射一箭無以見其優
長况馬鎗一項為軍中之利器凡兵丁一批馬糧即置烏
鎗於不論日久自然生疎以已得之技令其復失疎為可
惜或有竟由步弓箭挑拔馬糧未曾一試倘遇馬上應用
烏鎗之處又將何恃無恐且見直隸等省操演馬兵一馬
俱係先打一鎗後射一箭而滇省並未一見請嗣後操演
馬兵通照直省之例馬上騎射務須先放一鎗後射一箭
庶見技藝之純熟而烏鎗不致於生疎矣

一烏鎗兵丁宜遵例練打準頭也查火器之中烏鎗最為
便捷身法固不可少而準頭尤為緊要殊不知準頭即在

身法之中左右兩手高卑有分進退聯環上下相應心眼俱到中把自易且復遵乾隆元年 上諭再為中告行令本標三營及武潯二營凡演習鳥鎗既須身法合式又當達立把子加裝鉛子習打準頭純熟中多者有賞不中者有罰現俱能有準頭日就純熟

一鳥鎗手宜兼習弓箭也查營中弓箭鳥鎗均為衝堅破銳之利器而鳥鎗一項尚有陰雨潮濕火門不過之慮未及弓箭之施展自如不避風雨便捷較勝也是以考拔人材首重弓馬凡習弓箭者得以由步拔馬由馬拔官備級而陞至鳥鎗演放純熟原屬軍中利器而平時不能弓箭挑拔馬糧例不入選每見鎗手中有漢仗壯健出師功苦者終身一餉上進無階即或憐惜人材難得拔為弓箭步糧令其加意學習望可造就無如年歲過大骨硬腰直項

強肩堆蹶難如法仍未便拔補馬糧殊為可惜與其強學於拔補之時莫若預演於未挑之先夫功名之會人所爭趨慎察輿情俱皆心願自令學習以來捐製弓箭任其拉射人人奮志現在餘丁皆能步射日久自必精進凡有人材自不致於廢棄矣

一佩帶腰刀宜練習用法也查官兵佩帶腰刀原資防範禦敵之用若不知使用之法是有刀與無刀等現今奉文逐一加鋼刀則利矣問之官兵之中惟鎗手能用其餘馬步弓箭兵丁未曾學習倘遇邊兵相迫一時鎗箭不及施展非刀無以捍格是使用之法急宜講練且已通飭所屬俱令加意學習馬兵務習馬上腰刀之法步兵餘丁當學步下腰刀之法日漸學習現有十之三四但學習腰刀原屬分內之事而廢弛日久反若視為額外之操若不定以

必練之勢終難望其人之純熟請嗣後考拔馬戰名糧以及外委千把員缺務於烏鎗馬步弓箭之外復考其馬步腰刀若能挑砍架槩純熟得法者方准挑拔自必人人練習可望純熟矣

一技藝優劣宜分賞罰也查兵丁技藝原當習練嫻熟而董率之員示以信賞必罰更足以動激勸之心臣酌定凡步箭五枝全不中者責做層次降糧中一枝者勒限學習中二枝者合式中三四五枝者分別獎賞五箭俱中者即為記名烏鎗打把三鎗俱不中者把內有不過門者責做雖不中把而聲響結實者勒限學習中一鎗者合式中二三鎗者分別獎賞三鎗俱中者即為記名馬兵騎射生疎鎗箭俱不能出者責做降為步糧鎗箭雖不能中而不致於生疎者勒限練習一馬能於鎗箭之中上把一次者准

為合式鎗箭俱中者獎賞記名仍於技優記名之中彼此較勝以為拔補之次序

一官兵備箭宜照數實貯也查內外文武官員以品級之大小定備箭之多寡陞遷隨帶損壞添補例行已久自應實在製備而邊木巖疆更宜有備無患況例內在京文員尚須預備在外武職更有防禦之責豈容置之不論臣厯任經由之處每為查問兵多製貯官因陞調駛運為煩遂爾因噎廢食不製者多殊與定例有違竊思武職以弓箭為本務况箭為軍中首先利器豈可百年不用不可一日不備請通飭內外文武官員一體照額定數目製備長箭新舊接任即在交代不必隨帶以免駛載之煩遇有損壞隨時修補造入軍械冊內一體盤查保題如值查點之期缺少不備即以缺軍器叅處

一盞甲旗幟宜慎披執也查中樞政考內開盞甲旗轟軍裝等項除查驗操演日期及本管大員經過查點穿戴執持外如 欽差大員經過該巡防弁披執迎送將該管官罰俸一年等因遵照在案查委員點驗旗幟盞甲務要鮮明如遇本管大員經過適值天雨滂沛若不穿戴披執有違定例若遵例而行難免黝銹或有上司目覩淋漓令其避脫已屬無及即或公費有餘亦不肯以無益之迎送而損有用之甲幟况滇省公費不足每多長用而猶執此定例似非慎重軍裝之至意且滇省遠處天末旗轟盞甲製自粵東往來盤緣價值又昂更宜可惜嗣後除查點及大操迎春喜神雷降仍遵舊例穿戴執持遇有陰雨該管大員隨時酌用外如遇本管大員經過只穿戴號衣號帽執持舊存旗幟迎送庶軍裝不至易舊而公費可少省矣

以上九條多屬愚昧然臣心意中無非為調劑整頓起見
欣逢 聖主不避瑣瀆條晰以陳其中或可行之本標
或可通行各省或意見淺鄙尚未妥協統祈 皇上訓
示遵行

請考察駐防哈密官兵疏 乾隆十六年永 帝

安西提督臣永常謹 奏為請將哈密官兵亦照北路軍
營之例於班滿回營之時考察勤惰分別等次造冊咨移
以示鼓勵以裨防務事臣竊查哈密防兵例派叅游二員
都守四員十總八員把總十二員外委兵丁二千名二年
一次分班更換更換之歲在於安甘涼肅四提鎮營均勻
分派四月內更換一半八月內更換一半新舊相間以資
教習官兵抵防之後若有事故缺出即在防所官兵內遞
相接補歷來辦理原係妥協無須置議但查哈密防所軍

務關重派往之官兵臣等與營員皆係慎加挑選官則必
取年力強壯熟悉戎行之員兵則各批漢仗精健暹勉勤
慎者方敢派發以益防務該官兵平素仰荷 皇上泰
養深恩至優至渥得以赴防稍效奔走誠屬踴躍從事趨
將恐後惟是防所全局專仗卡倫該官到哈更須選擇十
分精細之人方令分班赴卡坐守瞭望哈密各卡設在天
山一帶並郭壁邊境天山乃極寒之地陰多晴少所作卡
倫均於山頂晝則潛身遠瞭夜則伏路靜聽夏被雨水浸
淋冬乃伏居冰雪之中臣曾經兩至各卡目擊其苦為之
挖坑苫蓋使稍可遮蔽身體然內濕外寒晝夜不息勤苦
日甚所以踴躍赴防甘此勤苦者多思上進以圖一命之
榮今防所雖遇事故缺出可望超擢奈防員無幾長班不
得一缺既無以示鼓勵為該兵暹勉之地且本營遇有缺

出又因該兵遠在駐防不能擢用迨至二年班滿回營或其所知之本官陞遷事故或其所知之提鎮陞調他往新到之官不知該兵之能否遂致所有之材往往隳其志氣而自抱老於卒伍之嘆臣因思及昔在古北提督任內竊見直隸宣化等鎮派往北路駐防官兵於班滿回營例由軍政大臣考察其在防之勤惰驗看其所負之材技分別等第優者列為頭等稍優者列為二等平庸者列為三等造冊報部由部記檔將冊咨移該督提轉發該本營俾其遇有官弁缺出即將註冊之頭二等官兵以次與在營合例應拔之官兵相間擢用高選拔於考核之中使兵丁咸有上進之階得以習力奮勉實屬鼓勵防兵之善法今哈密防兵事同一律獨此例未行似非仰體我皇上軫卹勞人一視同仁之至意用敢冒昧瀆陳叩懇 天恩

請將哈密防所官兵嗣後於班滿回營之時亦令駐哈鎮
臣仿照北路軍營之例將其在防行走勤惰慎加考察分
別等第造冊咨移由臣再加詳慎秉公勘定核實報部記
檔轉發該營亦照直省之例拔擢錄用則西北兩路軍營
事例既皆畫一而該官兵將來聞有征防之事愈知踴躍
奮勉殊於軍務有裨矣

請修溝河以弭水患疏 乾隆十七年 陳宏謀

河南巡撫臣陳宏謀謹 奏為請修繫要溝河以弭水患
以卹災黎事竊照豫省歸德一府在省城之東南所屬商
邱夏邑永城等縣地處窪下上承開封等屬之水下達江
南宿州等處舊有之河日漸淺窄每遇夏秋雨水畧多河
不能容水浸平地即成水災歷考從前自乾隆四年至今
乾隆十六年計十三年之中歸郡九州縣成災者八年數

收者三年中等有收者纔二年幾於無地不災無歲不賑
現在倉穀空虛有止儲穀百餘石及數百石者連年賑給
皆由遠處撥運即使今後設法備貯而時有災傷有借無
還倉儲仍歸空虛小民年年望賑風俗亦漸刁疲矣先經
前撫臣碩色奏請疏通河道請經撫臣鄂容安逐處相度
奏請將豫省淤淺之處次第開濬並多挑溝渠以資容納
近年地方官督率小民開挑小溝頗多祇緣下游江南宿
州境內之梁家橋翟家橋河道淺窄又有沙礮阻遏尾閘
未暢徒開上游亦難宣洩且恐倒漾為患是以未即興舉
臣到任查勘災賑所到被災地方就其水到之處得其受
災之由歸德一郡之水均由永城以達江南且由永城縣
直抵江南交界之宿州等處閱看豫省河流去路如宿州
境之渦河一道業已深通直至淮河從前阻塞之巴溝如

梁家橋翟家橋等處業經河臣高斌題請動項挑挖另

開越河改寬橋座巴溝之水由灘河以入洪澤湖經部議覆奉

旨允行現在興工疏濬則江南下淤業已通暢豫省歸德一郡之水不患尾閘不通惟患中多壅積正宜及早開修以廣宣洩臣一面將豫省溝河何者應歸民修何者應歸官修委員分別勘估一面將查閱緣由恭摺奏

聞在案今據布政使富勒赫具詳行據委員等逐段勘丈分別民修官修估計具詳前來除商邱之沙河陳梁沙河夏邑之毛家河岐河雲城之永豐溝惠民溝夏坡河橫河永城之色河澮河或係交流小溝或止間斷淤淺工段無多均令地方官督率民力挑濬外其商邱境內之豐樂河自朱家雙廟前起至夏邑交界之響河止計長二十四里一百五十四步零夏邑境內之響河自商邱縣焦家

莊起至永城縣交界之巴溝河止計長六十七里二百七十步永城境內之巴溝河自夏邑縣交界朱家橋起至梁家橋江南交界止計長九十五里三百三十五步均為該處管水洩水之幹河河身均已淺塞急宜挑挖寬深非民力所能勝任又商邱縣南門外有古宗河一道下達江南之渦河河身淺窄紆迴宣洩不利以致西來諸水均滙集於府城內外常年不消應於古宗河東西附近城濬處各開引河一道並將舊有古宗河挑挖寬深以資宣洩保護城池地畝並添設板橋三座永城縣加幫護城隄一道以上各工共估需土工料銀六萬六千六百餘兩查有積收之輸工銀十萬三千餘兩前撫臣鄂容安奏准存貯留充地方公用如蒙 俞允請於此內動支查商邱夏邑永城皆今年被災較重之地一入新春加賑已畢乘此特緊

要工程接續興修災地貧民得以趁食工程亦可速竣統
責成知府陳錫輅督率監修再委道員往來稽查仍令藩
司另造工段土方工料銀兩細冊咨部查核再所開各河
內惟永城巴溝河為諸水咽喉此一帶地勢本窪所有挖
河之土即於兩岸築隄倘遇上游水多下游一時難洩聽
其稍為停蓄小水之年岸即為隄大水之年以隄為岸均
不至於四溢為患仍開涵洞以洩溝水其築隄之費不另
請開銷惟隄外之河灘地畝久已成糧今既開河築隄隄
內之地可無水患隄外之灘地難免受淹永城之民頗有
藉名求賑之惡習請將隄外之灘地額糧豁除聽民種植
蘆葦等類將來如水浸隄根河灘被淹亦不報災庶免灘
民年年希冀報災請賑也其所挑之河所築之隄均責成
地方官分段交於有地之戶年年挑挖修築每年於春融

之後夏汛之前委員會同地方官查明出具河無阻淺隄無殘缺印結通報庶河隄常保無虞幹河既通凡近河受水之處均可多挑小溝洩水入河歷來受水之區可以免於災患較之年年報災放賑所省寔多而歸德一郡官民永沐 聖恩於無既矣

陳捕蝗利弊疏 乾隆十七年

莊有恭

江蘇巡撫 臣莊有恭謹 奏為備陳捕蝗利弊仰祈

聖訓事竊照蝗蝻為害田禾以致上廩 宸衷屢頒

明訓 臣職任封疆敢不竭力督捕悉心研究伏查蝻子

初發皆係叢生所占不過數尺之地多亦不過十餘丈而止若彼時立速撲捕即可消除惟羽翼既成則四散蔓延多費人力州縣該管地面大者三四百里小亦百有餘里寥寥數十名吏役原難徧歷巡查即保正鄉地可以就近

搜尋而地角田頭亦難履畝視到惟種地農民每戶不過數畝而又日在田間耘耨蝻孽萌發斷無不知但定例止有責成官員捕捉之條而無責成地主舉報之例雖屢奉捕撲踐踏給工本之

恩旨其明大義者固感激樂從而奸詐之徒惟恐得不償失且希延至飛躍即可移禍鄰田是蝗蝻為害實皆農民諱匿釀成以臣愚見嗣後每歲一交四月除荒山大澤河灘湖蕩無主管地責成官役梭織巡查飛報外其餘民地應請責成地佃巡查甲長舉報蝻孽一有萌生甲長一面撥夫撲捕一面通知地保報官即撥鄰保協濟如果通同諱匿別經發覺地佃甲長俱照不應重律當場責懲地保用小枷枷示仍令督夫搜捕淨盡然後釋放如已報到官而州縣不據實申報親赴督捕者仍照定例特疏嚴叅再查捕蝗定例僱募人夫每名計

日給銀以為飯食許報明督撫據實開銷原屬念卹農民至意但 聖主之恩膏愈厚而奸民之情偽愈生百姓恃有僱夫之例見蚶不肯自捕及應募受僱又復虛應故事希冀日領錢文因以為利州縣無可如何只得變為收買之法每蝗蚶一斗給錢多至三四十文民始踴躍趨事而奸民又有見蚶不肯即報待至長大捕買希圖多得錢文者是蝗蚶雖經捕淨而州縣所費已多司庫公費有限既難據報開銷州縣養廉無多又難悉責捐墊雖曰愛民實非長策查撲捕蝗蚶原係為民除害官弁猶暴露於風日豈百姓轉應偃息於家庭應請嗣後除荒山大澤河灘湖蕩無主管地生有蝗蚶仍照官給飯食或酌量收買外其民間糧地以及有主洲場俱責成地佃捕捉地主督催或撥鄰村夫役協助不准冒銷如此議定責成將農佃既

不敢匿報於初生亦不敢緩捕於臨時庶
聖主之恩
波不溢而奸民之情偽難施矣

請除蝻種疏乾隆十七年
周 燾

山西道監察御史加一級臣周燾謹
奏為敬籌除滅蝻
種之法以衛田禾以重民食事伏惟成周多稼螟螣務除
姚崇捍災焚坑並設定例蝗蝻生發地方責令有司撲捕
有不實力從事者處分甚嚴然上懸為令甲下應以空文
甚或甘受處分毫無補救及根究蝗蝻起處則鄰封互相
推諉希圖卸責亦其勢不得不然也我
皇上于惠黔

黎痼瘵在念上年閏五月間直隸河間縣偶有飛蝗即

勅諭督臣令所在州縣預為防範杜絕爾時臣工亦曾
奏申嚴議敘處分之例臣竊見事關民依因再四諏訪備
細研究始知捕蝗不如除蝻除蝻不如滅種謹以芻蕘之

一得為我 皇上陳之蝗蟲始由化生繼則卵生化生

者低窪之地夏秋雨水停淹魚蝦卵育迨水勢涸落魚子散在草間露惹泥塗不能隨流而去延及次年春夏生機未絕熱氣炎蒸陰從陽化鱗潛變為羽翔而蚋孽萌生矣其初出穉小如蟻漸如蒼蠅而色黑數日則大如蟋蟀而無翼土人名為步蚋及時撲滅猶易為力若再過數日則長翅飛騰隨風飄颺轉徙無定其棲集之處未黍頃成赤地若最盛則蔽日遮天盈地數尺墮埋人間房屋遠望如山縱行撲捕亦苦人力難施其為害殆不可勝言矣迨至蝗老身重不能飛翔則又羣集種子其種子也以尾深插堅土遺卵入地形如小囊內包九十九子色如松子仁較脂麻加小種子在夏則本年復生種子在秋則患延來歲苟非冬雪盈尺肅以嚴威至春融啟蟄之後滋生更繁害

稼更大若各處撲捕之情形則亦有可得而言者有司縱不愛民不能不畏處分畏處分即不得不張皇撲捕於是差衙役糾保甲撥烟戶設廠收買似亦盡心竭力不敢膜視矣然有業之民或本村無蝗撥往別處撲捕惟懼拋荒農務往往囑託鄉地勾通衙役用錢買放免一二人為費夫免一村為費庄鄉地衙役飽食肥囊再往別村仍復如故若無業奸民則又以官差捕蝗得日食工價為己利每於山坡僻處私將蚶種藏匿聽其滋生延衍流毒待應差撲捕之時蹂躪田疇搶食禾穗害更甚於蝗蚶聞地方官值蝗盛之時往往束手無策不過叩禱劇猛祈以神力驅除要皆循行故事未嘗講求拔本塞源之計者也臣聞蝗所自起不過化生卵生二端化生者宜於水潤草枯之時令地方官董率百姓縱火焚燒叢穢之區盪以烈焰草根

魚子都成灰燼永絕孽芽卵生者春深風煖土脈鬆脆輒
募民於前歲蝗集之處掘地取種陸續送官酌酬價值恪
遵上年閏五月間欽奉 上諭做行以米易蝗之令州

縣所收蝻種詳報上司核其真偽動用米穀准於公項開
銷在小民既可除害復得糊口自必踴躍從事而以米易
種較之以米易蝗似覺費省功多倘行之有效亦勤民重
穀之一事也臣伏見沿河州縣上年間被水災加以冬煖
少雪恐將來蝻子蠕動有害農疇合無請 聖慈勅下

直隸山東等省各該督撫令其博採羣議延問野叟務得
真實情形如果事屬有益即一面試行一面酌定章程奏
請 勅部定議臣不勝悚惶待命之至

皇清奏議卷四十八

陳河工事宜疏乾隆十八年

嵇璜

戶部右侍郎臣嵇璜謹奏為備陳河工事宜以重宣防
事竊今歲江南黃淮並漲上屋宸衷特遣大臣前往

經理復命廷臣會議一切事宜臣幼歷河干頗知梗

概雖形勢之變遷各異而修防之法意不殊謹就見聞所
及為我皇上陳之

一銅山以下清口以上之河身宜挑濬也決口既已奪溜
則河身必至淤高若不挑浚下流則決口雖堵而河流歸
故之後汎水踵至必難容受下游又將告險應將銅山以
下河身及早挑挖深通即難挑之處亦多開河溝既可以
引口門三溜而減堵築之勞又可以待汎水之來而廣容
納之地此第一要務也

一高堰等處石工宜修補也黃水入湖既久則石工罅漏所在多有應趁冬春水勢銷落之際逐一修補整齊並加築堰外之坦坡加幫堰後之工餞則石工鞏固而汎水不畏衝噬矣

一歸仁隄臨湖石工宜修也黃水既漫隄入湖則石工亦必塌卸查此隄所以隔斷睢湖諸水設有三閘相機啟閉最為緊要應及時修補以資障禦

一黃河兩岸之閘壩宜修復也河流自山東入江南境由廣而狹無以減之則隄工所在皆險靳輔之用閘壩減水蓋即古人疏分之意今或日久頽廢宜酌其可復者復之一黃河宜設浚船也治水之法疏之以分其勢尤必浚之以暢其流明臣劉天和之浚沙用平底方船橫排河中置三百觔重五齒之鐵耙於船杪沿流拖治則沙不停積而

河底日深今清口以上之河身舊日本淺宜仿其法以浚之則水由地中行而無虞泛濫矣

一下河宜設專員經理也查下河水利前者鄂禮治之後汪澄治之近尹繼善亦治之其所以不能永遠通暢者則以向屬淮揚道無專員經理之故淮揚道既管黃運江防工程事務至繁不能兼顧隄岸之傾頽河流之淺滯日久不治勢所固然應請設分巡道一員將下河水利令其經理庶責成既專而可無廢事矣

一上游之料物宜預備也江南黃河之險要全在上游五廳大溜所至非埽無以禦之一有墊陷即須鑲墊惟料物預備於先時斯緩急足資於一旦應於冬間辦運分儲各工至來年汛水長發或有昔險今平昔平今險之處俱可隨時接濟但須於辦運之後河臣實力稽查則河員不敢

虛冒而料歸實用矣

一堆積土牛之制宜嚴也河工向設堡夫原令其每日積土以備雨淋塌却之用今或日久廢弛過搶險之時無從覓土所係非細應責令廳汛等官時加督率務於遠處取土不得近挖堤根致多積水則歲計有餘於增卑培薄之道不無裨益

以上數條皆切近之圖非迂遠難行之事而南河關鍵則尤在五壩之蓄洩前大學士張鵬翮論滾水石壩與清口黃水形勢相照應取勢足敵黃過則聽其滾去蓋洩之太早則不足以敵黃蓄之過多又恐難於保堰其間量雨水之多寡審清黃之強弱不先不後適合機宜既無倒灌之虞又免下流之患則在河臣之操縱而已至於湖河形勢高寶諸湖下於洪澤湖運河下於高寶諸湖下河又下於

運河諸湖西南受滁泗天長之水又益以洪澤湖減下之水舊設南閘五里八里柏家墩車運減水諸壩定有四月六月開放之期固入為出以節宣之以故旱不涸運澇不傷隄今一切閉之不行是姑息下河而轉害於上游也臣聞治水之道宣洩與隄防相為表裏隄防以禦溢措宣洩以待異漲專事隄防而不講宣洩則大水猝至而無所歸水無所歸究之隄防亦不能固則欲弭患於將來不可不留宣洩之一策也

請開減河疏乾隆十八年

孫嘉淦

吏部尚書協辦大學士臣孫嘉淦謹奏為議開減河事目前黃河事宜仰承聖訓令臣等詳悉籌畫和衷共議此事所聞甚大頭緒紛繁臣拙於口說不能達意故詳書所見以奏竊惟欲導水者必先相山導小水者相小

山導大水者相大山天下之勢山分三幹水別四支恒山
九邊是為北幹衡山五嶺是為南幹華嵩泰嶽是為中幹
華山之陽江為南支華山之陰河為北支嵩山之南淮水
出馬鞍山之北濟水出焉此二水者南不入江北不入河
自為一派故江淮河濟名為四濟以其獨行入海也臣所
言大清河者繞奉山之東北起東阿而訖利津乃濟水之
正道四濟之經流非尋常之溝壑也依古以來與河別流
自宋熙寧中年河決澶州分而為二一由南清河入淮即
今之河道也一由北清河入海即臣所言之大清河也黃
河始奪淮濟之道矣北宋之末南北分流南渡以後河遂
南徙史不言其故大約金人塞北流以病宋可知而知也
元初河屢北決輒復堵塞大德初決蒲口廉訪使尚文言
相度形勢南高北下宜順水性導之北行決口勿塞為使

而有司卒塞之後蒲口復決水全北流竟如文言至正初
河決金隄等處丞相脫脫用賈魯充河防使大開黃河故
道水遂安流賈魯稱善治河乃導之北行未嘗令南徙也
明洪武時河決陽武東過開封南入於淮而河之故道遂
淤正統十三年河決張秋河灣東流入於海景泰時又決
張秋宏治時又決金龍口漫長垣趣張秋衝會通河以入
海按張秋並非河岸而史屢言決張秋者以黃河北決必
經張秋以清運河史以運道為重故書決張秋也張秋之
東不及百里即東阿之山山下即大清河黃河決水不能
踰山東走自必順河北行故凡言決張秋者皆由大清河
以入海史有詳畧故有書有不書也金龍口決後命侍郎
白昂治之塞決口三十六處而河乃入淮又以河徙入淮
終非正道乃自東平至興濟鑿小河十二道引水入大清

河及古黃河以入海量開減河以入清河古人有行之者非臣創為此言也自白昂治後河復決金龍口清張秋隄以入海命都御史劉大夏治之乃濬賈魯舊河以殺水勢開新河七十餘里導使南行築大行長隄三百餘里用夫十二萬有奇鐵木薪芻不可勝計而張秋之決塞蓋逼河使南行若斯之難也河用全力以爭之必欲北入海人用全力以堵之必使南入淮不能別籌運道而虧國計害民生逆水性以為此亦可謂拙於謀矣及於我朝運道河流皆沿舊制順治康熙年間河之決塞有案可稽大約決北岸者十之九決南岸者十之一北岸決後潰運道半不潰者半凡其潰運道者則皆由大清河以入海者也蓋以大清河之東南皆泰山之基脚故其道亘古不壞亦不遷移從前南北分流之時已受黃河之半嗣後張秋潰決之

日間受黃河之全然史但言其由此入海而已並未聞有
衝城郭淹人民之事則此河之有利而無害亦百試而足
徵矣目今銅山決口不能收功上下兩江二三十州縣之
積水不能消涸故且言開減河也上游水減則下游水微
決口易塞積水早消但河流急設開減河而奪溜以出不
可不防故且言減入大清河也大清河能受黃河之半兼
能受黃河之全從前屢試之矣況今三冬水涸即使大溜
全出尚不敵秋汛之半則大清河之必能容受可以理揆
也但自黃河以至張秋皆係平原曠野恐有漫溢然今年
陽武方法決出之水現在張秋境內其所經由不過長垣
東明一兩縣耳未聞成災也今於陽武之下開減河其道
更近則為患更小亦可以理揆也現今漕舟未上張秋之
運道空閑開隄使河東流初無碍也至於運道尤易為力

漕舟北上即從張秋入河順河北流五六日而可至利津
利津去天津之海道不過四五百里且在登萊之上並無
隘阻臣於乾隆三年由海道運登萊之穀三十萬石於天
津刻期可至顆粒無損此親辦之事非空言也即使並此
不敢則又有策焉大清河之經流在山東之北運河之南
岸現開減河數處皆與大清河不遠又滄州以下之宣惠
河臣所疏濬計其下游與大清河甚近開渠通之以達漕
舟亦非難行之事也計大清河所經之處不過東阿濟陽
濱州利津等四五州縣即有漫溢不過偏災忍四五州縣
之偏災而可減兩江二三十州縣之積水並解淮陽兩府
之急難此其利害之輕重不待智者而後知也減河開後
其至張秋不過經兩三州縣之境計其漫溢之處築土埂
以禦之一入大清河則河身深廣石岸堵築之處甚少約

計所費至多不過一二十萬而所省下游決口之工費賑濟之錢米至少不下一二百萬此其得失之多寡亦不待智者而後知也是則減河一開所費甚少為害甚輕而決口可塞積水可消漕舟不誤其利甚大 臣熟思之計無便於此者故詳言之惟 皇上採擇焉

備陳邊防事宜疏 乾隆十八年

尹繼善

太子太保署理陝甘總督革職留任臣尹繼善謹 奏為

備陳邊防事宜仰祈 聖訓事竊照準噶爾部落僻處

西域習俗強悍性情狡詐與中國西北邊境均屬接壤則防邊之道甚關緊要近來新撫台吉夷情未定防範之法更宜加意謹嚴我 皇上聖謨廣運 特遣大臣於

西藏北邊分路前往又因安西哈密孤懸塞外 命永

常努三馳赴防守一切機宜 指示周詳所以為邊疆

籌計者已無微不至永常等荷蒙 聖恩簡用自必盡

力邊防臣身膺重任敢不同心共商殫竭愚忱以期先事

綢繆仰紆 睿慮於永常等過安西時謹就 臣愚昧所

知與之詳細講論意見相同所有應行備辦事宜逐條開

列陳奏仰祈 睿鑒

一安西將備宜慎選得人也查安西地方孤懸塞外為甘肅之藩籬哈密之保障所設備戰兵三千一遇有警即須稟先起程前往應援則領兵將備甚為緊要必須久歷戎行才具強幹者方為緩急足恃 臣留心體察現在安西將備內明幹之員頗為不多迨至有事之時將就委用倘有貽誤關係匪淺 臣現咨安西提臣王進奉將安西各營將備詳加考核其實在年力強壯熟諳夷情勇往急公辦事幹練者應行留用外如有循分供職才力中平者即行咨

明臣於陝甘兩省各營內挑選能員另行奏請調補務使安西將備人人可用庶緊要邊疆可以收指臂之助矣

一備戰官兵應挑選精銳也查甘涼安肅留各標營備戰兵丁原係為防守邊城應援哈密而設必須人人精銳件件富全有一兵方得一兵之實用從前原議凡備戰各營責成該提標鎮將應派戰兵分定額次預先派定每年點驗一次如有老弱殘疾者即行更換並將領兵將備千把俱行派定以免臨時急遽年來邊方寧靜第恐該管鎮將視為泛常臣現在咨行各提鎮將所有備戰之兵逐名點驗務期漢仗壯健技藝熟練應更換者即行更換不得以老弱之人混行充數一切軍裝器械務須收拾鋒利整理齊全凡將備千把必慎選才具強幹熟悉邊情者指名派定如有事故另行選補以上預備事宜原係常年應辦並

非另事更張總在加倍留心慎熟料理不得虛應故事統限一律辦齊報明督提衙門分委大員查驗如有奉行不力怠緩從事者即將該管鎮將嚴叅重處

一備戰馬駝應加意喂養以歸實用也查各處戰兵應需馬駝從前議定除本營撥用外其不敷之數俱係各鎮標屬營內就近摘撥一聞口外有信刻難遲緩戰兵起程全賴壯健馬駝行走迅速必須喂養以時調習如法方得收其實用誠恐各該將備粗於宴安不能用心料理且現在咨行各提鎮將備戰馬駝詳加查驗如有疾應更換者作速更換如有倒缺尚未買補者作速買補並令加意喂養用心調習務使一律適用倘有以口老病廢充數或缺額不即行揭報並勒限查竣報明督提派委大員於閱看戰兵時一體查驗仍責令各鎮於每年巡查之時通行驗看

具報督提查核如此則馬駝咸歸實用緩急為有備矣
一路徑宜先勘明水草也查哈密如遇有警安西備戰之
兵首先應緩甘涼安肅兵分定額次二次相繼出口其行
走之路由肅州至哈密自榆灣抵東長流水前往共計三
路又安西標協之兵前往哈密一由橋灣一由茨窩泉亦
約抵東長流水會操惟沙州之兵另由可沙石一路抵哈
密各路有八九站郭壁既十站郭壁不等即間或有草不
敷牧放必須裹帶草束其沿途水泉甚是稀少或行數十
里或行一二百里始有一處水泉亦僅足供一二百人馬
及四五百人馬之用三千人之大隊必須分起行走若不
將何處路徑便於行走何處水草足以供若干人馬之用
於平日詳細勘明則臨時分隊之多寡行走之緩急不能
料理得宜未免倉皇失措彼此擁擠萬一水草不敷必至

人馬疲困臣與

欽差永常努三再三講論亦以此事

為必應善辦臣現在移咨安西提督分委委員將通哈道路詳加查勘某處之兵應由某路行走每一千兵應分為幾起如何彼此聯絡前後照應何處水草足供人馬若干春夏情形若何秋冬情形若何一一繪圖貼說咨送臣與永常等酌定行知備戰各鎮營分委明白員弁將所指路徑並有水草去處預先看明則胸有成見庶臨時不費周章而兵丁不至苦累矣

一派防哈密兵丁應酌帶鳥鎗以資禦侮也查哈密防兵二千所需鳥鎗從前善後業內照操演陣勢配用弓箭鳥鎗牌刀之數於哈密舊存軍需餘剩鎗內留給防兵鳥鎗一千八十桿又留鎗二百三十餘桿以備損壞更換此外又另給回民鳥鎗一百桿令其協同防守嗣經陞任安西

提臣永常以藤牌批刀等項係口外無用之具奏准停止
令兵丁專習弓箭鎗砲此後各標營派防之兵每百改派
鎗手七十名共派烏鎗兵一千四百名哈密留守之鎗不
能敷用現經安西提臣王進泰於安西餘鎗內撥足其各
標營派防之兵本營烏鎗歷來並不攜帶第思烏鎗一項
最為利器防兵抵哈之後各該鎗手兵丁雖俱有鎗應用
但自各該營以至哈密長途行走空手前往設中途遇有
警報何以赴援或遇賊人逸截何以應敵皆不可不為意
外之慮應請嗣後甘涼安肅四標營每處派換防守兵丁
各帶烏鎗二百桿應需鉛藥等項一并隨帶酌量添給駝
載於撤防時仍將原鎗照數帶回如此則換防之兵添有
器械沿途既得防禦而抵哈以後設遇緊急多有烏鎗數
百桿凡弓箭兵丁以及客民內能放鎗者均可執以防守

器械充足擇禦有資於防務更有裨益

一哈密防所鉛藥宜多為預備也查哈密兵丁防守城堡火器關係緊要鉛藥等項必須寬餘備貯該准安西提臣王進奉轉據防鎮冶大雄查報防兵需用鉛藥等項向照實在兵額估支造報若遇風雷停操等項歷年俱有節省現在共節存鉛丸二萬二千五百餘觔火藥二萬八千八百餘觔請將此內酌量備貯餘但留為操演之需肅州本年現製火藥暫停解送等因臣查哈密防兵需用鉛丸向在哈密公庫軍需餘存項內動支其所需火藥因哈密遠處塞外一切硝磺物料素非出產是以由內地州縣製造解送在平時無事之際自可陸續運供支設遇急需臨時猝辦則緩不及事今歷年用過鉛藥既有節存貯庫邊防重地多為預備實有裨益且現又奏請添駐防兵多撥

烏鎗則將來需用之數較前益多倘遇有事援兵糧餉不能多帶鉛藥亦須臨時接濟應將前項餘存鉛藥統作哈密備貯另行造冊報部其肅州所製火藥仍行按年解送以供操防嗣後如有節省鉛藥據實報出在于下年應支數內扣除節省按數減造仍將預備火藥照依內地標營之例按年出陳易新以昭畫一通融統計于限銷業內分晰報部查核 奏銷如此庶備貯充裕而緩急足恃矣

一哈密兵糧宜預為籌酌也查哈密防兵口糧係計口授食必須積貯充盈方為有備無患如俟臨期撥運未免迫不及待從前軍需業內存哈糧石原屬豐裕除歷年公支外現在哈密舊存米麥二色三萬餘石加以前任藩司楊應琚奏請撥運沙柳二銜小麥二萬五千石通計不及六萬石之數以現在防兵二千約計供支五六年如蒙

恩准加增防兵一千僅可供四五年之需若從內地撥運程途寫遠需費浩繁自應預為籌計檢查善後案內原議安西等處遇有收之年酌量採買以供備貯乾隆六九年節次議請動項採買安西沙柳等衛共買過糧十餘萬石已有成效應請照依原議于各衛地方酌量採買餘糧以備緩急又沙洲衛額貯小麥一萬餘石供支兵糧並戶民借給籽種等項歲需三萬餘石但籽種以秋成後交還每年又有額徵糧石餘糧儘多應請於每年農隙之時在沙洲衛倉內動撥小麥數千石運往哈密所需腳價查照成例給發如此源源接濟邊貯得以充盈不致臨時周章矣至安西一帶或遇糧石不敷應用肅州現貯各色糧二十餘萬石即可隨時就近撥運無虞缺乏合併陳明一分貯銀兩宜就近酌備也查雍正年間各府州縣分貯

銀三萬兩嗣准部咨各省直隸州之銀或貯司庫或寄貯于附近之府庫隨將肅州收貯銀兩提至甘州府庫寄貯但查肅州地處極邊所派備戰兵丁為首先出口應援之師一聞哈密警信立即起程一切支應必須立時給發勢難刻緩而肅州額徵之銀本屬無幾無可墊應若赴甘州支領往返須時未免迫不及濟且照各省直隸州有經徵錢糧之責款項繁多加以分貯銀兩易致混淆是以從前定議改歸府庫以杜虧挪等情竊今肅州現有道員駐劄應請將甘州府寄貯肅州銀兩於甘肅道庫存貯以備急需實為有益至備貯銀兩均應實貯無缺方能應急查平涼西寧二府備貯並甘州府寄貯肅州銀兩內有節年借支墊應等項較原貯之數多有不敷支應殊有未便臣現將凡有備戰兵丁營分逐一查明如有缺少應請一併在於

司庫查款撥足庶幾供支有備戰兵行走得以迅速矣

一哈密一帶城垣宜修理堅固也查防邊之道重在堅壁

固守而固守之道要在城堡堅完哈密有新舊二城回民

又有分駐五堡一遇有警即須將回民牲畜收入城堡協

力守護使賊人進不能攻退無所掠以待援師即為制勝

之法是城堡所關實為緊要哈密新城以雍正五年動項

興修其回民各城堡前于善後業內已令回民逐一修理

但為日久恐有風雨剝削踐踏損傷之處不可不未雨

綢繆日咨行安西提鎮並安西道委員查勘如有損壞之

處應動項者即酌請動項修補如應回民修理者即督令

回民自修其一切砲臺牒樓俱令逐一查驗收拾完整安

西沙洲靖逆橋邊一帶城隄如有殘缺亦查明一律貼補

並須安靜辦理不必過於張皇以駭聽聞庶塞外城垣俱

有金湯之固可以有備無患再哈密火藥已于城外另築
圍塼收貯雖係通連大城周圍塼垣甚屬單薄難免疎虞
自應加高培厚與大城相等方為妥協臣現在咨行提鎮
詳細確查統俟查明分別咨題一面即行辦理

一哈密牧畜種地宜在附近處所也查哈密遠處塞外切
近準夷如卡倫報警凡散處回民及一切牲畜均須收入
城堡堅壁拒守是以從前奏定每年九月初一日以後防
冬之際官兵馬匹即上槽喂養回民牲畜俱令於城堡附
近廠內牧放如相近塔爾納沁之巴達山暨大小天生圖
東榆樹溝滄學溝等處相距哈城遙遠向來不許回民前
往耕牧近因竄謐日久哈密回民不能思患預防因有前
往各該處耕種牧畜者萬一準夷侵犯邊界急切不能收
回殊有關係應責駐哈總兵詳細確查並令哈密貝子玉

素富晚諭回民務在近處屯種不得遠赴沁城一帶如有
已經耕種者於秋穫之後速行收回回民牲畜甚屬有限
無論冬夏俱今在近處牧放並不時稽查勿令任意遠去
庶一聞警信均得隨時奔入城堡堅壁清野不致有意外
之虞矣

請嚴口外各廳巡查疏乾隆十八年 方觀冰

直隸總督臣方觀冰謹 奏為請嚴口外各廳之巡查以
重地方事竊照熱河屬五廳十巡檢司武職分隸一協四
營之十二汛地方遼濶不下數千里在在崇山峻嶺僻峴
深溝一切遠來墾荒就食之民皆散處其間復遠逾邊境
與蒙古錯處其中安分者固多而匪類亦復不少向來各
廳屬就民人居址流寓處所每處設牌頭一名合數牌頭
設鄉長一名合數鄉長設鄉約一名其蒙古地方教漢柰

曼翁牛特土默特各處流寓民人附近歸入八溝塔子溝等廳管轄亦設有鄉牌等責今互相稽查並呈報命盜等事准是各鄉牌等亦係不根之民未可即恃以為約束而口外又因汎廣兵革墩撥遼遠且蒙古地界更非營汎所轄是稽查之法不密則耳目即屬難周臣欽承 聖訓

詳詳務求邊圍寧謐惟有文武互相巡查定期立法加密於前使山僻之區常有官兵經臨往來查察則鄉人等自不敢容納奸匪瞞官作獎而其力為可用臣查文職有道廳巡檢等員分別巡查應令巡檢各於所轄地方每季巡查一次廳員相驗會審公出之時本多應令於所過村莊並附近山僻之地以次巡查務無遺漏熱河道應於所屬地方每年巡查一次臣思該道事務尚屬簡少而分巡原屬道員專責應令改為一年兩次巡查以重責成武職有

副將都守千把外委等員其專防一汛之千總外委地界不達原應撥續巡防不許在汛偷安應令於交界處按半月彼此會哨一次四營都司守備每季各於所轄汛內巡查一周河屯協副將每年兩次查閱營伍即令遍為巡歷其汛地僻遠者更須親到以資彈壓至教漢柰曼翁牛特土默特等處向無營汛除今附近管轄之廳員巡檢隨時稽查並熱河道與各旗及各部員等員令辦公務之便親歷巡查外臣復查土默特東南鐵溝地方向年固有逃匪繁集滋事議令熱河總管按每年前往巡查一次自改設熱河副都統以來至今仍循舊例日查鐵溝東距熱河約七百餘里鐵溝西北即係放漢柰曼翁牛特土默特等處邊界民人流寓之所鐵溝西至熱河稍紆其路即可兼查一周以補營汛之所不及如此則處處皆有所稽查復時

時警動其耳目庶良民益知畏法而奸匪無所容身所有
巡查會哨各地界期限章程容且移行該副都統並該道
協等各按地方切實情形另行籌酌咨部備案至於保甲
最為稽匪良法口外各廳雖不能悉照內地然亦可做照
行之應今稍為變通不必限以每甲十家之數祇就一村
烟戶之多寡酌量編立其零星散戶不成村落者即三四
家亦可自為一甲先令該管巡檢挨戶編查每戶給一門
牌懸掛開明籍貫姓名口數年貌生業仍以原設牌頭領
之凡有新來形跡可疑之人一概不許容留違者治以連
坐之罪其有依親靠友貿易傭趁實有歸著者令其報明
廳遞添入門牌許其居住其蒙古界內種地民人亦令一
例編次給與門牌按現在各戶務使歲有減汰不許增添
凡新來民人即係依親靠友亦不准其容留如有吃酒行

允偷盜生事不法之徒即稟明各該廳查究驅逐其門牌所需紙張筆墨之費即令該廳於公費內動用嚴禁藉端科派仍令熱河道於出巡之次逐村抽查如有查辦不實及容留無籍之人將該管廳官分別記過叅處其鄉牌人等即行責治簽換如此則匪竊既難託足而散處之流寓民人皆有數可稽於以戢奸暴而安善良較之祇設鄉牌又為周密矣臣因口外山境僻遠奸良叢雜務在稽察嚴密謹行愚昧之見恭摺陳奏

陳賑務及隄工疏乾隆十八年

鄂容安

兩江總督臣鄂容安謹奏為奏明事竊臣於本月初十日銅山工次起程取道睢寧邳州宿遷桃源清河一路赴淮由清口高堰山盱順隄查勘十七日抵蔣京壩所有勘明水勢隄工情形與臣嵇璜等恭摺會奏臣沿途留心體

察賑務復面與按察使許松偕等詳加講論隨時催督妥辦並籌災重各邑明春接濟其續因成災分數加重之處亦已查明核實補給民情均屬安貼冬月以來天氣雖尚暖而嚴冬在即煮粥一事應在十一月內舉行今經撥米設廠預為料理其勸諭與商人等捐備棉襖陸續據報已收有成數各州縣多在一千件上下亦即行令速解以備發給高堰隄工所需石料向來所辦不足丈尺以致工程不能堅固若今次仍復碎小雖必取回重辦然曠日廢時猶恐遲誤是以先行馳札飭知令其窰大毋小並催速辦臣又憲山東分辦一半路途稍遠或不能如期達到因查得江寧蘇州常州三府已共有六處可採俱發銀委員分督採辦並據報已開工趕辦務令隨得隨運源源到工以期早為竣事臣一俟勘辦下河疏鑿事宜定局後即往

山東催督斷不使之遲誤致屢

聖懷十六日在高堰

接奉

硃批臣前摺荷蒙

訓示周詳臣當悉心體

認期於行之得宜至撫臣銜哲治莊有恭性情質地誠如

聖明洞鑒即如辨災一事銜哲治所見在於宜濫毋

遺臣思卹災極患

皇上固不恤千百萬帑金使無一

夫不得其所然愚民之奢望無窮 國家之經制有定使

明知其不應得而與之則必有應得而反不與者矣外省

習氣專事揣摩意指若屬員知上司意在於寬則沽名釣

譽假公濟私何所不至且冒濫之端一聞不特虛糜帑項

更恐實在災民反致遺漏水旱事所常有今不深思後料

難繼是以就臣所見已向銜哲治愷切言之江蘇吏習向

來疲玩因循撫臣莊有恭意在整飭或有不及詳查之處

然論其本心尚非刻薄臣每與言論竊謂振作不在於立

成而姑息非所以為愛養平時與屬吏教誡不先迨至有
事徒繩以法是屬吏之獲罪上司實有以成之惟嚴憚於
外不取浮名體恤於中得使展布庶地方期有裨益目下
辦理災務之各州縣或有心苛刻罔恤災黎或故意市恩
虛糜帑項以及濫容胥役地保冒濫侵漁皆在所當斥若
出於偶爾疎忽或限於尚未諳練以致稍有不妥則過屬
無心止應隨時改正分別記過中飭以觀後效倘遽行叅
斥另易生手所易之員未必即勝前人於賑務徒見紛更
轉有延誤臣以此詳諭莊有恭伊亦以目前言為然至臣
等身受封疆之寄責任重大若扶同遷就止博和衷之名
不顧公事之實誠為上負 主知若急自炫所長矯情
立異必致意見參商有乖政體非協恭共濟之義屬員無
所適從其中不肖者乘機離間暗中播弄北端甚微為害

甚大且與衛哲治莊有恭前日面商論及於斯期共相檢
點有事則共相妥計不存成見勿聽浮言惟求一是以仰
副 皇上教誨成全之至意緣蒙 恩諭故敢縷陳

伏祈

訓示

請舉秋報大禮疏乾隆十八年

龔學海

光祿寺少卿加一級臣龔學海謹 奏為請舉秋報大禮
以備祀典以崇 聖治事臣竊惟王者父天母地事天
一如事親宗廟之禮禘祫而外四時備享其祀天也冬圍
丘春祈穀夏大雩至享帝則秋祭也唐虞三代以來典制
雖異而祀義則同簡冊具存班班可考我 皇上乘乾
御宇敬 天勤民祈穀冬祀諸大禮每歲 躬親復

特舉常雩示為民祈禱至意古制備祀事明千載一
時也所猶未舉行者季秋享 帝大祀耳臣聞雩祈也

祈百穀之雨也享報也報百穀之成也有祈必有報祭之
禮也且夫祭天所以法天四德備而為乾四時具而成歲
秋享之祭協春祈以仲崇報歲祀全而天人合 聖天

子隆舉斯禮端在今日且謹接季秋享帝之文載在月令
而秋祀昊天上帝闕元禮亦復可稽程子云古者一年之
間祭天甚多春則因民播種而祈穀夏則恐旱暵而大雩
以至秋則明堂冬則圜丘皆人君為民之心也欽惟我

皇上愛養黎元有加無已當夫萬寶告成普天豐樂皆
上天錫佑之恩仰祈 皇上舉行季秋享 帝

大祀以答 天庥以合於四時備祭之義洽四海之歡

心益展 聖主敬 天勤民至意百司羣僚曷勝忭

舞至其規制儀文之詳仰祈 勅下禮臣敬謹集議恭

呈 睿鑒要於酌古宜今斯所為式來茲而光前牒者

也。做臣學識謏陋，典禮未諳，何敢冒昧陳奏仰責。天聽但幸際禮樂明備之時，承乏執事，奔走之末，敬獻芻蕘，用抒忱悃，無任悚惕屏營之至。

請舉行蜡祭疏 乾隆十八年

曹秀先

浙江道監察御史降一級留任。臣曹秀先謹奏為誠能動物德廣好生，敬抒鄙見，恭祈

聖鑒事。臣竊觀邇來

近畿郡縣蝗災間發，仰蒙我

皇上特遣大臣侍衛勤

督地方，有司實力撲捕。

天語悚切，懲賞攸昭，毋令滋

生貽害。田稼似此視民如傷，誠求保赤之心，固

上天

所垂鑒。下民所共感者，臣嘗讀小雅大田之詩曰：去其螟螣及其蠹賊，無害我田。稭田祖有神，秉畀災火。蓋言致禱於神，默除害也。唐臣姚崇遣使捕蝗，引此為證。夜中設火，火邊掘坑，且焚且瘞。宋臣朱熹亦以為古之遺法。如此他

若史書所云蝗不入境又或一夕飛沉東海未必概屬附會而禮言蜡祭七日昆蟲宋儒陳皓注為螟蝗之屬又知螟蝗有靈亦得與於祭也蓋從來物類雖微各受一命物性雖蠢咸格於誠易中孚之象曰信及豚魚前聖所言幽明合契是以驅虎祭饅摘文禱祀著有明徵今蝗蝻蝻蚱雖然並生蝸蝓蠕蠕不可勝計要亦各分造物之微命慮其害我田稼苦我百姓勢不得不遵古法竭力撲捕然食苗亦死不食苗亦死此則情法俱窮之時也臣諱思螟蝗得與於祭之義雖當蜡索曷若及時前者夏間少雨官司禱求不聞微應迨我 皇上虔祈甘霖立沛德且足以

格 天誠自可以動物敢懇 皇上萬幾之暇

御製祭文一道頒發郡縣遇有蝗蝻之地即行敬謹騰黃虔具酒猪張幕焚香告祭於神俾蠹茲蝗蝻限以一日二

日適跡於荒曠之野宿莽之墟各逃生命逾期不用命官吏鄉保多倍人數竭力撲滅既以廣

聖人好生之德

自當切為民請命之誠臣料田祖有神陰相除殄必不復留遺育以滋授於青疇綠野中也可否仍於冬令考稽故典舉行蜡祭以合禮經之義恭候

皇上欽定抑曰更

有請者舊時州縣捕蝗多係捐辦今奉

恩旨許令動

公該州縣更不得藉口無力但一法立即一獎生州縣意必報多上司以其報多駁詰往返愈繁素贖請嗣後捕蝗時雇募夫役用支錢糧酒令同城教職佐雜一面會同給發一面即簽書名押開報該管上司查核至奏銷時准為定據並嚴飭不得假手家人書吏致滋混冒以往年恩賜絹米煮賑等件尚有冒銷其弊不可不預防也臣言是否可採伏祈

皇上睿鑒訓示

請嚴鄉飲報部之例疏 乾隆十八年 張若震

西安布政使臣張若震謹 奏為請嚴鄉飲報部之例以杜冒濫以重 大典事竊查鄉飲一事禮載聖人制之以道鄉人是以賓主象天地介俱象陰陽三省象三光所以明尊長所以明養老俾民知尊長養老之義而孝弟之行立典恭重也 聖朝飭令直省舉行務擇齒德兼優者

當之載在今甲而各省奉行不一有一歲正月十月舉行二次者有祇於十月中舉行一次者有舉大賓介賓者賓各一人者有舉大賓一人俱賓二三人者相沿日久或亦慎重將事或且視為具文或以無人堪舉頻年闕略或由州縣官舉報督撫批示奉行或止報藩司而不及督撫章程既有參差典禮亦未畫一行之未能慎重所舉難期悉當甚至既與鄉飲之後間有過犯漫無稽核似於 大典

未協日愆以為十室之邑必有忠信豈一州一縣之中竟無年高德劭之士堪示儀型是闕畧固所不可而冒濫尤所當嚴應請 勅下部議嗣後鄉飲酒禮各省畫一每歲十月中舉行一次務令州縣官確加遠訪於紳士中舉一人為大賓者庶中舉一人為介賓一人為耆賓均擇懿德兼優鄉黨推重之人詳報府司督撫核實推准遵照禮文所載鄭重舉行一面將姓名籍貫報部存案既與鄉飲之後倘有行止不堪犯案到官詳報咨部斥革仍將原舉州縣議處如此則不致所舉非人而克副 大典者自必共以為榮即身膺舉報之責者亦不敢漫乎從事庶閭閻咸知觀感似于人心風俗不無裨益是否有當伏祈

聖鑒訓示

皇清奏議卷四十八

皇清奏議卷四十九

請籌辦子牙河壩事宜疏乾隆十八年方觀承

直隸總督臣方觀承謹 奏為籌辦子牙河壩事宜恭請

聖訓事竊照子牙河為濟澄會流之下游由獻縣河
閘入大城縣境經楊家庄王家口莊兒頭等處循隔淀隄
匯入天津之三岔河向來舟楫通行長蘆引鹽赴畿南各
屬行銷並皆由此通運緣大城境內河身窄狹西隄偏臨
河岸每當夏月漲發堪虞乾隆五年議于楊家口開挑支
河分減漲勢下穿閘兒莊東隄導由陳家泊仍歸正河嗣
因楊家口汕刷日益寬深支河分十之七八正河水止二
三分溜緩沙停漸致淤墊商船阻滯鹽餉起剥歲多勞費
而支河下窄閘兒莊東隄之水過多青靜境內數十村莊
並虞淹沒行據天津道議將楊家口至王家口正河五十

餘里挑挖深通另行相度地面建築滾壩以減異漲經臣
在於 行宮繪圖 奏請 聖鑒指示臣隨赴大城

率同道廳各員徧歷東南兩堤復乘船周迴察看正河自
楊家口起至莊兒頭計長四十八里有零河身並皆淤淺
自楊家莊至于牙橋北一十八里零淺窄尤甚河身僅深
二三四尺其楊家口支河現寬十四五丈深七八尺至一
丈一二尺不等今若因支河分溜過多議加堵塞使復正
河舊軌不特支河水深溜湧施工不易而正河本甚淺窄
即使大加挑浚必不能如支河之寬深水既不能移深就
淺則正河仍恐不免淤填徒費帑項自恣心籌畫查支河
自楊家口至閻兒莊東堤止計長八里有零現今深通暢
順兩岸約束循軌安流儼然通津自宜因勢利導即將長
八里作為正河再于閻兒莊河尾北通蔡家窪沿留兒莊

東堤抽挑河槽一道下接黑龍港舊河展挑深通俾楊家
口以下全河俱于子牙橋北歸入正河通計應挑河道止
九里有餘且蔡家窪近堤處所現在水一二尺至三尺五
六寸不等祇須就其高下加挑較之疏浚正河一十八里
之長實為事半功倍而形勢徑直計其程途比正河尚為
稍近即將挑河所起之土就近培築東堤舟楫緣堤往來
不惟風浪無虞兼有緯路可備其自楊家口至于牙橋北
淤淺之正河毋庸挑挖亦不必攔截應即留作越河以分
殺水勢惟將子牙橋北至莊兒頭之正河三十里隨其河
底高下一律挑深七尺則高船民載均無阻滯每年運赴
順廣大各府屬並豫省行銷之二十萬引鹽無須起剥尤
資利益至閻兒莊現在河流穿越東堤三處應建築攔河
草壩堵塞堅固使循軌之水悉歸正河另于壩北東堤之

上修建滾水石壩一座俾夏月盛漲正河不能容納之水由此分溢即以堤外舊河作為引河如此則舊洩均屬有裨正河不至停淤堤工得以鞏固而青靜境內數十村莊永免淹浸之患實于河道商民大有裨益茲據委員按照河工則例逐一確加估計蔡家窪應挑河槽一千一百八十丈面寬五丈底寬三丈均深七尺仍按現水深淺除算黑龍港五百八十丈應間段展挖面寬六丈至八丈底寬三丈深七尺至九尺不等子牙橋北至莊兌頭五千三百六十丈應于河底抽批子河面寬五丈底寬三丈均深七尺仍按河底高下除算並閘兌莊築攔河草壩一座共約估需工料銀一萬八百七十兩零又滾水石壩一座金門寬十二丈壩高四尺所需石料除滄州文安河間查舊存石塊湊用祇須運脚不開買價外約估需工料銀四十八

十五兩零通共約估需銀一萬四千九百六十餘兩再挑河利運于上年冬間即據蘆商懇請籌辦臣商之鹽臣吉慶以每年行銷二十萬引鹽所省起剝之費每引所出無多即可集事商人俱情願輸公辦理應請將批河築壩二項應需銀一萬八百餘兩先于藩庫查款借撥充用今蘆商按其引鹽起剝之歲需分作五年扣還歸款其束堤應建滾水石壩約需銀四千餘兩應請于司庫節年歸公平餘項內動撥興修臣謹將覆加籌辦情形繪圖貼說恭請聖主訓示欽遵即分項遴派委員上緊如式批築務于汛前完竣仍令天津道就近督率稽查剋扣冒銷等弊事後核實分別報銷為此謹奏

陳義倉告成繪刻全圖疏乾隆十八年方觀承

直隸總督臣方觀承謹奏為經理義倉告成繪刻全圖

恭呈 聖鑒事竊照積貯為本計所關而推行惟義倉尤便蓋鄉村分貯則斂散可以隨時典守在民則吏胥無由滋弊歷稽前代良法具存自周禮遺人之掌門閭鄉閭各有委積以待艱阨隋臣長孫平因之為義倉之制令諸州百姓當社立倉隨所收穫勸課出輸領之社司以時賑發唐宗憲相遵仿至朱子而規畫備詳倉雖以社為名事實與義同例一切輸受之法條目兼該而其要尤在地近其人習其事良以官之為民計不若民之自為計故守以民而不守以官城之專為備不若鄉之多所備故貯於鄉而不貯於城其輸之也不勞其散之也易徧其操之也不迫其察之也易周是以積久而盡不生施博而澤可繼雖有水旱不齊之歲而無倉皇四出之民制莫有善於此者也我 皇上念切民依 仁周節屋凡於備荒足

食之政靡不 宵旰勤求尤以義倉足資民間緩急於

乾隆十一年十月內特降 諭旨命地方大吏乘時勸

導臣先於直隸布政使任內與督臣那蘇圖欽遵 訓

諭酌議條規以有穀而不善其地則浥變可實有地而不

察其形則經界莫定故勸捐必先建倉建倉必先繪圖當

經指示屬員通行備照及 旨蒙 恩擢任畿輔因復申

明前今次第經理就其幅輻之廣狹度其道里之均齊於

四鄉酌設倉座自三四區以至十八區其地必擇人烟稠

密形勢高阜之處使四面村莊相為附麗近在十五里內

者三十三縣在二十里內者七十三州縣在二十里及二

十餘里者三十三州縣在三十里內者三州縣在四十里

內者二縣期於往返各便調揀易通比年以來仰賴

聖主福庇年穀豐登人民和樂臣與諸有司隨宜勸導俾

各出其有餘而不限以數粟悉從其使務在樂輸無稍
勉强如一州邑中豐歉不齊歉處即停其報捐選擇倉正
專司簿籍不許吏胥干預現據報捐新舊義穀共二十八
萬五千三百餘石而圖與倉先後告成州縣衛各具一圖
大小村莊並各村到倉里數悉載統計為圖一百四十有
四合一百四十四州縣衛共村莊三萬五千二百一十為
倉一千有五且詳加訂正鏤板刷印一貯布政司庫一貯
本州縣衛按圖以稽倉而知各村之孰達就近按倉以稽
穀而知四境之或絀或盈由是儲蓄逾年有增規畫因時
漸擴而有司凡於境內賑輟惠民之舉辦方隅計道里披
圖瞭然亦足以資措置且謹參合新舊事宜酌籌規條另
摺奏請 聖訓久遠遵備以仰副我 皇上惠保

無疆之至意茲將義倉全圖按府州所屬繕寫十四冊

列凡例恭陳 御覽又所刻各州縣衛倉園謹彙次裝

成六軸一併恭 進

請裁撥官兵疏乾隆十九年

咨爾吉善
雅爾哈善

閩浙總督臣咨爾吉善浙江巡撫臣雅爾哈善謹 奏為
請裁可省之官兵酌增衝要之營伍俾官無冗設兵歸實
用事竊照 國家設立官兵必官有難以旁貸之職守兵
有汎防護守之專責斯官無冗設餉不虛糜若職任儘可
兼辦兵力並無專司亟當裁省無益之官兵以歸有益之
用臣等伏查浙省海塘從前並未專設官兵遇有應修應
築工程向由地方官辦理南岸塘工則歸寧紹台道北岸
塘工則歸杭嘉湖道管轄迨康熙年間海潮直趨北大壘
杭郡仁和海鹽二縣濱海地方日受衝噬勢甚危險我
聖祖仁皇帝 世宗憲皇帝屢遣重臣指授方畧不

惜百萬帑金興築鉅工俾禦洪流保全郡邑數十年間成
亘古未有之大工然此時並未設官兵防護海塘也雍正
八年始行題准專設海塘同知並設海塘千把總暨兵二
百名專司經管夫役 欽差大臣等奏准增設海防兵
備道員增設同知通判並設道標左右二營守備各一員
千把外委及兵八百名連原設兵二百名共一千名皆於
塘工人夫內挑選壯健諳練之人補額蓋因石塘並添築
築土各塘之際工鉅事繁不得不特設官兵以專責成亦
因時制宜之道也自我 皇上御極以來潮勢日漸南
趨大工以次告竣乾隆十二年十月內海潮衝刷中小壘
故道嗣是江流海潮盡歸中壘北岸仁海二縣塘工相去
水道十餘里至數十里向之險工盡成平坦矣彼時撫臣
方觀承因海潮漸趨南勢慮南岸紹郡塘工受險會同臣

喀爾吉善具摺奏將防營官兵掣調一半歸南岸防護汎
守並將紹郡海塘工程責成紹興府水利通判經管在案
緣海潮初走中小疊勢尚未盡將來汎守修防或南或北
或繁或簡未可懸定故也茲臣喀爾吉善自乾隆十二年
蒞閩浙之任臣推爾哈善自乾隆十六年蒞浙撫之任稔
經熟歷者已數年於茲凡南北兩岸土石柴工興修汎汎
坐守機宜並江流潮汐往來衝刷情形隨時留心隨處體
察備悉端委竊見先後添設之海防文武官兵實有宜於
裁掣更改者臣等查浙省海塘道廳官兵原係仿照河工
廳汎文武之例設立防汎但河工官兵一年挑伏秋凌四
汎時時必須防險修守若海塘則當潮溜通塘之時每日
兩潮皆有衝擊汕刷之患如康熙雍正年間海窻一帶塘
工受險非人力所能捍衛迨至潮勢南趨而後塘外漲沙

綿亘一二十里不特每日雨汎並不到塘即伏秋大汎亦無衝嚙塘工之事至於南岸土石各塘去湖溜更遠惟山西三江二閘以及宋家樓石工湖汊尚有到塘之處為地無幾其餘則塘外沙坦皆成膏腴桑麻廩舍相望從無湖溜抵塘之事是現在兩岸所設官兵防無可防守不必守實與河工汎汎須防時時宜修者迥不相同以臣等詳察情形博採輿論海塘官兵非特現在溜歸中小疊南北兩岸毋庸汎守修防官兵實可裁減即遇湖溜逼塘之時需官兵汎守亦止應如康熙雍正年間暫時調集督辦鉅工毋庸經制額設虛糜帑項若以南北兩塘綿亘遼闊土石各工攸關綦重就其形勢止須專設廳員照河工按里設立堡夫修守隄防之例依康熙年間舊制統以就近道員督率調度已為周詳慎重所有續設之道標官兵亟應請

裁者也至杭州為首會重地抗協城守水師兩營官兵為汛守之師有地方官之責兩營額設兵丁一千五百餘名其數不為不多無如分防水陸八縣地方實屬汎廣兵單駐劄省城內者僅副將一員城守都司一員把總外委各一員馬步守兵四百十餘名省城內各衙門防守倉庫監獄以及護解餉犯防守水陸城門皆城守專責僅藉此四百餘名官兵擔應差使奔走不遑何能按期操演且省會五方雜處奸匪盜賊全藉城守員弁遊巡緝捕省城周遭三十餘里僅一副將一都司一把總顧此失彼實有地重員少之患又乍浦水師營駐劄乍浦原設水師叅將一員守備一員千把總三員水戰守兵四百八十餘名該處逼近黃盤大洋乃江浙外洋扼要之衝遊巡防汛已屬責任綦重自乍浦設立滿營水師一切修造戰艦配製軍火器

械皆專責該營將備經管差務倍加繁重僅一守備例應帶領兵船扼守洋面跟隨守鎮舟師操演與叅將輪流出洋一將一備實覺任重責大竭蹶不遑且等酌量於輕重緩急之間誠宜裁撤可省之海防道標官兵即以之酌撥抗乍二營汎廣兵單差繁員少之地化無用為有用以裨省會重地海口要區所有應行酌量裁改分撥事宜且等謹條分縷晰啟為我 皇上陳之

一道員請裁南北兩岸海塘應就近歸併經理也查海塘南北兩岸塘工近者相隔海面二三十里遠者相隔海面百里兩岸工程各不相顧非若河工南北兩隄呼吸相通應顧彼顧此者也海防道既請裁汰北岸仁和海鹽海盜平湖四縣境內塘工悉屬抗嘉湖道管轄地方巡道事務尚簡且四縣塘工皆在駐劄地方百里內外應照康熙年

間之例歸併專管其南岸紹興府屬蕭山山陰會稽三縣
土石塘工所更較北岸減少宜紹台道駐劄靈波巡查來
往海塘皆必經之路南岸工程應請照康熙年間之例歸
併宜紹台道專管兩巡道皆應兼海防字樣所有海塘廳
汛等官均歸兩巡道分管以專責成其杭嘉湖宜紹台兩
道歸併海塘事務往來巡閱工程塘務費用不無加增每
員應於裁汰海防道養廉內各加增養廉銀五百兩以資
辦公

一海塘同知通判宜更定分管疆界也查北岸塘工自八
仙石起至戴家石橋止計八十五里零向歸海防通判經
管自戴家石橋起至九里橋止三十八里向歸西防同知
經管自九里橋起至淡仙嶺止四十九里向歸東防同知
經管其南岸塘工於乾隆十二年奏准歸併紹興府水利

通判經管今北岸土石工築塘悉皆鞏固止須防守無事
興築應請將八仙石起至戴家石橋止八十餘里塘工歸
併西防同知經管其自戴家石橋至淡仙嶺止八十七里
塘工仍歸東防同知經管淡仙嶺至江省交界仍歸乍浦
同知經管統歸抗嘉湖道管轄至南岸紹郡塘工今該府
水利通判兼管終非專員應將北岸海防通判改為南塘
通判移駐紹郡三江城即將乾隆十二年改設之右營守
備衙署酌加增修改為通判衙門歸寧紹台道管轄調度
至凡有塘工各縣所設之巡檢典史各按所管地面分所
管理塘工查點堡夫照河工文職汎官之例聽同知通判
查核差違俾佐理有員無顧此失彼之慮

一南北兩岸塘工請酌改兵丁為堡夫專司看守也查兩
營原設馬步守兵一千名內有僅諳修防不習弓馬技藝

者應請於守兵內挑出四百名改為堡夫照南河堡夫之例在堡看守凡土石柴工一有墊陷坍塌該堡夫即刻稟報所管捕巡捕巡轉報廳員查明如止些小坍塌廳員立即調集附近堡夫修砌完固如必須動帑修築即通報勘估查北岸工長二百八十九里零工程較重應請設堡夫三百名一里一夫並酌立夫頭分司管束南岸工長二百餘里平穩者居多應請改設堡夫一百名於塘工給與堡房一間除原有堡房外其應添建之堡房即將裁撤兵房變價改建至堡夫月給錢糧查南河定例每夫月給工食銀五錢又於隄內撥給淤地十五畝以資耕食今浙省海塘內外淤沙均經民窳承墾並無隙地可撥應將海塘堡夫照守糧月給銀一兩不給月米所需錢糧即於裁撤兵餉內撥給

一海防兩營裁撤官兵應分別撥歸抗乍兩營以裨要地營伍也查海防營額一千名除於守兵內改為堡夫四百名外尚餘馬戰守兵六百名應請撥歸抗協城守營二百名內馬兵二十名步戰兵六十名守兵一百二十名撥歸乍浦水師營一百名內步戰兵三十名守兵七十名尚餘馬兵四十名步戰兵七十名守兵一百九十名共兵三百名均行裁汰其撥歸抗乍兩營兵額所有海防營原存一切軍裝器械以及口糧生息俱按額兵數目各歸改撥營分入額造報其兵營房亦將原有各處兵房變價令各營酌量添撥購造給兵接止改撥裁汰兵丁六百名內有年力已衰不能學習弓馬水務情願告退歸農者聽其歸農其年力精壯者逐一挑驗諳曉水務者撥歸乍浦水師營其諳練弓馬鎗砲等技者撥歸抗協城守營入伍差操至

應裁汰兵三百名除自願告退歸農外其現存額兵暫歸
抗協寄額於近省杭嘉湖紹四府屬各營內遇馬步守兵
有缺額應行募補者即於寄額兵內撥往頂補陸續將裁
汰兵糧開除毋庸募補

一抗乍兩營添撥兵丁應增設弁備以符營制也查抗協
城守營僅一都司省會城垣倉庫奸匪盜賊巡查實屬乏
員應請將現裁海防左營守備改為抗協城守營中軍守
備駐劄省城與都司分任巡查地方其乍浦水師營原額
並現請添撥兵額幾及六百名可分為左右兩營應請將
原設守備改為左營守備仍兼叅將中軍其裁撤之海防
右營守備改為乍浦右營守備均勻額兵列為兩營遇出
洋遊巡操演以及扼守洋面兩營守備遞相輪流以一員
長駐乍浦口稽察地方操演兵丁乍浦叅將每年仍兩次

出洋面稽查勤惰綏靖海洋其海防兩營原設千總四員
應以一員撥歸杭協城守營以一員撥歸乍浦水師營原
設外委千把總十六員以四員撥歸杭協城守營以四員
撥歸乍浦水師營亦驗其人材技藝宜於水師者改入水
師宜於陸營者改入陸營俾不致用違其才其餘千總二
員把總四員外委八員均行裁汰內有年老不能學習弓
馬水師者聽其告退其年力壯健弓馬可觀者留於本省
各營內遇有千把總缺出即行拔補

一海防官兵裁剩經費併塘工經費以資撥用也查海
塘經費每年雖有題定撥用費一萬餘兩為歲修之用但
遇有修築工程經費不敷仍需題動正項今海防道員既
請裁撤每年裁省養廉俸工役食與兵四百名改為堡夫
節省月費並裁汰馬戰守兵三百名餉米約計每年裁省

銀一萬兩請將支剩裁省各項銀兩歸入海塘經費業內以資歲修則經理裕如即有修築工程亦無庸更動正項以上各條臣等於海防添設官兵與省乍要地營制熟察情形再四籌酌實有宜於因時損益者不揣冒昧斟酌變通俾官兵無虛糜之患要地受巡防之益即海塘經費從此充裕亦有備無患矣是否可採伏乞 皇上聖鑒訓

示施行

請清查訟案以省冤累疏乾隆十九年陳宏謀

陝西巡撫臣陳宏謀謹 奏為清查不結之訟案以省冤累事竊惟民間戶婚田土不得其平咸欲赴官控告此州縣衙門日日必有之事即地方官逐日應辦之事也無如地方各官於 欽部案件有關叅處尚知上緊趕辦遲誤者上司亦必行催惟於民間告詞則以為自理之事可

以推延上司無案可查常至經年累月延擱不結則兩造
多人之守候拖累胥吏衙役之差提需索地方訟棍之恐
嚇唆騙百弊叢生有告業未結而兩造已至破家其負屈
不甘者則事外尋釁藉端報復每每一案化成數業小業
釀成大業凡謀故命案匿名揭帖聚眾械鬪毆差拒捕行
賄營求一切不法之重案由小事不結而起者居多久經
定例州縣自理詞訟限二十日完結每於月底將一月內
事件填註循環簿並已未完結緣由送該管知府及直隸
知州查核註冊其遲延不結朦混遺漏者詳報督撫咨參
因此等告業情節繁冗各省多難遵行即有造報者不過
將已完數件送入搪塞仍于稽查無益也近經臺臣條奏
部議再申前例恐亦查送不全仍蹈故習即以閩省而論
欽部事件臣與督臣清理開單督率兩司逐月稽查

數月之間已經十之七八向後不致壅滯惟自理詞訟未完者衝繁州縣不下數百件此中胥役舞弊小民受累不少臣巡歷所至查知情形正思責成清理欽奉

恩命

馳驛赴陝中心耿耿且思生齒日繁人情巧偽訟端日漸繁多官司勤惰不一各省大概相同且之愚見惟有責成大員就近稽察專司督率於事庶克有濟巡道職任監司刑名錢穀皆有經管所轄州縣無多相去不遠原有分巡之例臣請通行各省道員分巡每到一縣即遵將該縣訟案號簿提到查核除不准及已完結外未完者逐一查核勒限催審有關積賊刁棍衙蠹者亦即提到親審胥役弊匿者當下提究巡道查畢一縣即將某縣未完幾件一面開單移司報院一面行縣定限完結地方官結一件即將某件已完具報巡道逐一註銷單內止開某事某人告某

人於某日審結不必詳載審斷情由又致繁瑣難行下次分巡亦復如此稽核知府直隸州有未結詞訟難於掩飾不得不上緊趕辦院司於通省某縣詞訟未完多寡及各官辦事勤惰才情敏鈍均可得其實在而道員分巡每到一處有此切實應辦之事為民間伸理冤累以助兩司所不及以收政平訟理之效分巡不為虛行督撫即以覘道員之公私能否是亦循名核實察吏安民之一端也

陳粵西事宜疏 乾隆十九年

羅源漢

大理寺卿臣羅源漢謹 奏為敬陳粵西事宜仰祈

聖鑒事竊臣前奉 恩命提學廣西凡屬考試所經無

不留心體察竊見地方事務尚有應行籌酌辦理者敬為

我 皇上陳之

一 荒土之宜勸墾也粵西地廣人稀日嘗經過柳州之馬

平來賓以至思恩之遠江一望數百里盡係荒蕪並無人煙問之途人皆云其地多石且少水源難於開墾且詳視土面芳草俱極豐茸不盡硤确而山泉所滙可相勢利導水源者亦復不少細查荒蕪之故有二一則習為閒惰土人僻處鄉村歲種熟田餬口已足不為隔歲之謀又俗好趁虛手藝營生利倍力田甘心拋棄一則各惜工本將欲開墾必先疏鑿渠壩以資灌溉水源之蓄已費數十金愚民見狃目前遂多憚於從事而且亦嘗於該地方籌及每以工本浩繁貧民難強為慮竊思 聖世生齒日繁苟可謀食幾無棄壤而獨此廣袤數百里置於無用殊為可惜仰請 勅下督撫諭令州縣多方設法富者勸其自墾貧者或招募人墾其或有不宣水田之處亦諭令種植雜糧俾盡地利庶野無曠土民有餘食矣

一驛馬之宜改設也查桂林向無驛馬北至湖南之永州各縣設有站夫數十名東至廣東之肇慶各縣設有站船數隻且嘗就所經過處按其形勢東由平樂梧州至肇慶俱係崇山峻嶺難於設馬若北自靈川興安全州至永州路可方軌遇緊急公文站夫遞送自不及駟馬為速況柳慶素屬產馬之地取辦甚易似不若改站夫設馬之為使也再由柳至南太雖非他省通衢亦係邊疆要路現除舖司遞送公文外各處設有快足以備緊要名曰千里馬其實日行七八十里每致誤事並請 勅下督撫查酌各該縣情形設馬數匹遇緊急公文以馬遞送迅速十倍於人力矣

一教職之宜酌定邊缺也廣西近邊一帶地方煙瘴官其地者三年五年以邊俸陞轉向來教職事同一例雍正二

年部議教官係本省人裁去邊缺原為煙瘴新穉地方起見若太平府之靈明州慶遠府之東蘭州以及泗城府等學俱在雍正七八年以後新設現今水土極惡稱煙瘴最甚之地而臣考試所歷若桂平梧鬱潯各府州水土本佳與內地無異以桂平數郡之人選泗城靈明東蘭等地水土實不相宜臣於考試時接見該處教官受瘴多病實有苦情合無仰懇 聖恩 初部今議將泗城靈明東蘭三學俱作調缺酌限年分任滿即撤回內地另選新員或亦愛惜人材之一端也以上三條臣愚見所及恭摺具陳是否有當伏乞 皇上睿鑒施行

籌塞外倉儲疏 乾隆十九年

永 常

陝甘總督臣永常謹 奏為敬籌塞外倉儲以期有備無患事竊照安西等五衛地方孤懸天末界接準夷實為西

塞藩籬極邊重鎮其於一切邊防武備善後機宜屢經

聖主睿思裁定實已周密無遺惟倉糧一項雖於善後
案內亦經議定安西等處遇有收之年酌量採買以資備
貯但五衛地皆砂磧田多鹹鹵產糧有限即逢有收之年
採買亦難充足故自乾隆六年議准採買以來現在五衛
倉貯僅積存京石糧二十萬石有零合之倉石則實止一
十四萬七千餘石從前戶民尚不甚多兵丁亦鮮有家室
仰賴 皇仁煦育生聚日滋現今五衛民人較前倍衆
加以貿易商賈由內地而來者所在雲集合鎮兵丁將及
萬名搬娶家室者復已十有八九生齒既繁則需食益廣
况哈密駐防官兵口糧咸賴五衛撥運際此昇平之世原
可無庸過計第接歲採買不能一時充裕逐年動撥更屬
有減無增萬一荒歉不齊緩急需用仰給於五衛之糧僅

有十餘萬石斷然不敷若撥運於內地不特脚價浩繁抑且達不濟急此臣永常向任安提恒所深慮而臣鄂樂舜亦謂目今所當急籌者也臣等在蘭密諭該司道等妥協密籌去後茲據布政使吳士瑞安西道文綬等議稱邊地倉貯洵應充裕今統計五衛現存京斗糧雖有廿一萬石零合計倉斗僅十四萬七千餘石為數無多而哈密兵糈又仰藉五衛之撥運年復一年有減無增本地採買既因豐歉不齊未能充裕口內撥運又因戈壁途遙輓輸費重伏查甘省捐監一條原為常平積貯而設當日未及五衛者蓋由乾隆三年初定捐例之時口外人戶尚屬寥寥是以未曾議及迨至乾隆十五年復議收捐遂亦踵循前例畧而不議近來戶口殷繁商賈雲集一應貨物皆從內地運至如准入籍本地俊秀及外來商賈子弟於出口貨車

帶運糧石即在各衛報捐監生則急公愿捐者定不乏人
既無妨於口外之民食且與倉儲可期日裕查高台肅州
捐監之例每俊秀一名捐京斗粟穀一百石折米五十石
准作監生但口外戈壁載運維艱按照現定官價自高肅
運糧至五衛地方每石脚費遠近不等以適中最近者而
言亦合計應需銀一兩五錢零至一兩零不等是運口外
之脚價倍於內地之糧價若不量為酌減難期踴躍再三
籌畫五衛收捐監糧應請照高肅之例減二收捐每俊秀
一名捐米四十石准作監生其公費倉費俱仍照高肅之
例按數交納至於原增附生及武生青衣生有欲捐監者
即照高肅成例減二報捐又甘省之人多喜麵食而哈密
供支兵糧亦需搭給麥麵且甘涼肅一帶產麥甚廣其報
捐監生有愿以小麥自內地運交者亦照米數一體交收

所捐米麥總令內地運至概不許在五衛爭糶統計五衛酌定額捐米麥共一十五萬內安西衛四萬石柳溝衛三萬石沙州衛四萬石靖逆衛二萬石赤金衛二萬石請俟捐足之日停止等情到 臣等伏查甘省各屬荷蒙

聖恩准令本省及外籍之人報捐監穀以裕倉儲業經行有成效口外五衛從前未及併請者原因人戶未繁今已戶口滋盛商賈雲集現在各衛倉儲實未充盈專藉稔歲採買斷難一時足備若恃內地撥運又覺輓輸繁費似應俯如該司等所議五衛地方如有本地俊秀以及外來商賈子弟愿在各該衛交納米麥捐監者准照高台肅州之例酌量減二一體報捐酌定五衛捐足十五萬石即為停止公倉各費亦照高肅之例每捐監生一名令交公費四兩倉費三兩二錢其康增附生武生青衣生捐納之數均

朕高肅減二收捐合計俊秀捐監一名納京斗糧四十石
或米或麥聽其自便是較高肅止減米十石在俊秀商賈
以出口貨車陸績帶運所捐米麥得比內地稍減自可聞
風踴躍愿捐者衆而以收納在倉之數計之則較之內地
官為較運之費節省不啻倍蓰矣况捐監米麥俱令內地
運至並無妨於民食而五衛遇豐收之年仍可照善後原
議隨時採買庶幾塞外倉儲計日可期豐裕邊防重地得
以有備無虞洵為因地因時之急務臣等詳加商榷意見
相同謹合詞繕摺陳 奏是否可採伏祈 皇上睿鑒
勅部議覆施行

請稽察閩省莠民疏 乾隆二十年

德 舒

福建布政使 臣德舒謹 奏為敬陳管見仰祈 睿鑒

事竊照閩省昔號南蠻追溯前明淪為盜藪我 朝定鼎

以來漸仁摩義縉紳効力宣猷士明請書守法固已駸駸
乎風移俗易矣乃結習相沿謀為不軌之事時有覺發舊
染未能盡除地方尚稱難治臣仰沐 皇恩昇以藩臬
之任在閩數年詳細採訪熟求其故祇因剛地僻處海濱
又多深山邃谷習尚强悍以好勇鬥狠為能無論秀頑好
學拳棒往往創立會名聯合聲勢原其初意不過圖禦外
侮迨聚集日久結交既廣或恃勇技過人或逞機謀聚眾
肆然無忌遂刊偽印散偽劄妄恃猖狂蠱惑人心蹈叛逆
之罪而弗悟究之其間好事生釁者不過數人而事不預
防勢遂漸熾愚民墮入牢籠誤罹法網牽連株累情亦堪
憐夫人情稍有技能必不甘於淪沒果其膂力技藝可觀
心思材智出眾願令幼而壯壯而老老而鬱鬱閑居精神
意氣一無所事勢必紛紜不靖宋臣宮弼曾言兇險之徒

讀書應舉仕進無路心常快快以至訂尋兵書習學武藝
因此張大胸膽遂生權謀往往晦名說姓潛跡遁行與其
徒密相結煽此輩散在民間縱無惑謀實能始禍要在得
而靡之蘇軾亦云窮其黨而去之不如因其材而用之何
者其黨不可勝去而其材自有可用明臣卹濟嘗言紛紛
擾擾之徒為人所刳制者心無定志為利而動既可以誘
脅而來亦可以哄嚇而去無足慮者所慮者粗知文義識
古今者爾其言足以動眾其智足以設謀其縱橫說秘機
畧變幻尤易惑世欺人平時宜有以收拾之等語方今天
下一家 聖主德威無遠弗屆偶值奸民蠢動無不立
時剪滅何足深慮惟是安不忘危我 皇上諄諄以久
道化成訓誡臣工而釐奸懲暴常切 宸衷臣竊思一
鄉一邑其有善習拳拚膂力過人更或粗識機謀者州縣

為親民之官管轄不過百里果能留心訪查何難周知惟是形迹未著無暇可指既難即置之於法且例載游手好閑不務本業自教師演弄拳棒教人及投師學習罪止枷責是依例決罪僅能懲戒於一時其自負強梁終難革面革心平居無事尚或斂跡藏形設遇豐歉不齊難免乘機煽惑此等賦性兇頑散在民間良民受其戕賊實為地方隱累臣愚昧之見與其重懲於事後不若嚴飭於未然應請嗣後查有教演拳棒肆虐閭里並以智術鼓動愚頑實為惡跡昭著者州縣報上司究詢明確將為首之犯解省審訊定案除照依所犯各案盡本法懲究外簽發遞解直隸河南等處安插去其首惡則夥黨自解其有膂力超越技藝純熟心思材智實有機謀者雖現在尚無過犯亦不得不收束其身心臣伏查雍正九年欽奉

世宗憲皇

帝諭旨各省中膂力出羣藝勇出衆之輩若聽其棄置無用之地深為可惜今各省督撫等召募揀選咨送兵部揀派官員訓練教習以備軍旅之用欽此欽遵在案恭錄

諭旨

聖意淵深似應密令州縣細加採訪開明姓

名住址先行密稟督撫再加詳查明確揀選舉報咨送兵部請旨發交巡捕三營及直隸等省並沿途各標給

食名糧効力試用著有勞績量加賞拔如技勇尚在次等而舉動不馴者酌量本省督撫提鎮各標給糧鈔束既因其材而用竇求其材而馭之使身隸羈縻心無他向再查濱臨江海崇山疊嶂之區足以藏奸者恐不止閩地一省為然可否仰懇

皇上密飭各省督撫嚴諭州縣一體

察訪查辦如此庶已犯者有所懲創而未形者潛可轉移操縱在官動有稽察且遷徙異處人地生疎難以施其伎

倘更使該處士民曉然有犯即治以端趨向知所做惕則
根莠既除嘉禾自植地方咸臻寧謐矣

皇清奏議卷四十九